



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

47. Kalenderwoche – ab 16. November 2008

Vorgessn un vorbei

Guhd, wenn de Kinnor heidzudaache nisch mähr wissn, währ dor alde Geehde gewähsn is, odor ooch sei Kumbl, dor Schillor, dann is das villeischd schade, abor nisch direggd schlimm. Die beedn sinn lange dohd. Außordähm, wenn die jedzde in de Vorgessenheid geradn dun, dann kenn die sisich eischendlich nisch beschwährn - die sinn ja werglisch lange genuch beriehmnd gewähsn!

Irschendwann dud jedor ma in de Vorgessnheid geradn. De meisdn Leide ja schon zu Lähbzeidn!

Viel schlimmor is ja, wenn de Kinnor heidzudaache nisch wissn, wo ihre Eldorn un de Großeldorn hährgekomm sinn. Nee, was die Kinnor ibor de DDR nisch wissn dun, das is ja noch schlimmor, als wie das, was se wissn! Un das, was se wissn, das is eenzsches Durschenandor!

Dor Erisch Honneggor, dun die denkn, das is eenor von eenor Musiggabelle gewähsn, weil dähr ma von Udo Lindberg eene Schallmaie geschenkd gekrischd had. Von Beruf war dähr Mauror gewähsn, dor Honeggor, denkn die, un dähr had sei halbes Lähm mid dähm Bau von dor Mauor in Bärln zubgebrachd. Wo se dann ferdsch gewähsn is, de Mauor, da is e Bfarror aus Leibzisch gekomm un had die Mauor umgeschubbd. Vorhähr haddor nadihrlisch gebähded, dähr Bfarror: Vador unsor, dähr du bisd im Wesdn, gib uns deine De-Marg, dein Reisch komme...!

Un dann is dor Wohlschdand ibor de ehemalige DDR hereingebrochn. De dollsdn Bliedn hamm bledzlich gebliehd! Alle Leide haddn nu was zu Essn. Keenor mussde mähr dähn Einheidsbrei in dor Betriebsgandiene neindrehn. Jedor konnde zu MegDonalds gehn. Außor die, die bei dor Schdasi warn. Die mussdn weidorhin Solljanga leffln mid russisch Brod dazu. Die friehor nisch bei dor Schdasi warn, das warn alles Freiheitsgämbfor, die jedn Daach ihr Lähm risgierd hamm, nisch schdudiern durfdn un in feuschde Wohnungen wohnen mussdn. Neubauwohnung gabs bloß fiehr

Genossn. Un das ganze Färnsähn kam aus Mosgau. Währ Wesdfärnsähn geguggd had un erwischd wordn is, dähr is ins KZ gekomm. Nach Wandlidz odor Bankow mid Sondorzuch!

In dor Koofhalle mussdesde de Vorkeeforinnen mid "Heil Erisch" begrießn, sonsd hasde keene Buddor abgekrischd. Un dann ooch - alle Kinnor mussdn in de Kinnorgribbe. Dord sinn die mid Rohdlischd offgebäbbld worden, wie de Hiehnor in dor Großmasdanlache. In dor Schule hamm de Lähror dähn Kinnorn Marx un Lehnin eingedrischdord. Wenn welsche nisch gegloobd ham, was dor Lähror gesachd had, gabs Foldorschdrafe. Un es is nisch bloß beim Vorzeischn dor Inschdrumende gebliehm. Hammor un Sischl hamm furschdbare Wundn hinnorlassn!

De Wesdbaggehde mussdn bei dor ördlich Meldschdelle von dor Volgsbollezei abgegähm wern. Dor Sigmund Jähn wollde mid seinor russischn Ragehde damals eischendlich ooch in dähn Wesdn abhaun... Nee, laudor so een Gwadsch wissn die Kinnor. Abor wohähr sollnses ooch bessor wissn, wennse nischd Bessres erzähl krischn?

Eduard Sachsenmeyer